



Nuuk 17-10-2022

UKA2022/159

Arfersiorfiup ukiukkut qimussimik tuttunniarfiusalernissaa siunertaralugu Naalackersuisut peqquneqarnissaannik Inatsisartut aalajangiiffigisassaattut siunnersuut. Piffissaq ukiukkut piniarfiusoq tamaat isigalugu, sumiiffiup siunnersuutigineqartup qanitaani nalunaarutip atuuttup aalajangersagai assigalugit suliaqartoqassaaq.

(Inatsisartunut ilaasorta q Kristian Jerimiassen, Inuit Ataqtigiit)

Siullermik siunnersuuteqartoq Siumumiit qutsavigaarput imatullu oqaaseqaateqassaagut.

Qimussimik ukiuunerani Arfersiorfimmi tuttunniartoqartalernissaanik isumaq Siumumiit tungaviatigut ajorinngilarput.

Isumaqarpugut periuseq piniariaaseq kultooritsinnik attassiinnarsinnaanermut tungaviulluarsinnaasoq siunnersuuteqartup qaqqikaa, tassami ilisimavarput ukiuni makkunani qimmit qimuttut annertuumik ikileriarsimanerisa kingorna periutsinik ataavartinneqarnissaannut tungaviliisunik peqartuarnissarput assut kissaatigalutigu oqaatigissuarput.

Naalackersuisut akissutaanni sapinngisamik tuttoqarfimmi pineqartumi tutut akornusersorneqannginnissaat pineqarpoq, sapinngisamik ukiuunerani kulavaat ilumioqarnerisa nalaanni, tamanna tungaviatigut paasilluarparput, innersuukkusulluguli piffinni allani aamma ukiuunerani qimussimik tuttunniarnissamut akuersissuteqartoqartarnera, taamaasillunilu nerisaqarnikkut inuiaqatigiinnut annertuumik iluaqusiiffiusumik kinguneqartartoq ilisimagatsigu.

Piffik pineqartoq paasisarput malillugu nunataa annertoorsuartut taassallugu killeqarpoq, tuttullu tassaniittut amerlassusaat soorunami eqqarsaatigilluarlugit piniarneqassappata piniarnerup ingerlanneqartarnissaa kissaatiginarpoq, tassami tuttoqassutsip innarlerneqannginnissaa pingaaruteqartoq avaqqunneqarsinnaanngitsorlu pinngitsoorneqarsinnaanngimmat.

Soorunami Siumumiit kissaatigilluinnarparput ukiuunerani qimussimik tuttunniartoqassatillugu tuttoqatigiinnut ikiliartuutaanngitsumik tamatumap ingerlanneqarnissaa pisariaqarmat, nungukiartuutaanngitsumik piniartoqartarnissaa partiitta pingaartippaa tamatumallu malinneqarnissaa inassutigissuarput.

Taamaammat siunnersuut tungaviatigut paasillugu aammali sapinngisamik pitsaasunik tungavissanik peqartoqarnissaa siunertaralugu kissaatigaarput sukumiisumik suliarilluarneqarnissaa siunertaralugu ataatsimiititaliamut susaaqartumut ingerlateqqinneqassasoq.

Jens Kristian Therkelsen Siumut